

佛說五大施經

七經  
合刊



佛像

佛說五大施經

佛說八大人覺經

藥師如來本願功德經

般若波羅蜜多心經

佛說戒香經

楞嚴經大勢至菩薩圓通章

摩利支天菩薩經

上海图书馆藏书



A541 212 0010 1833B

上海图书馆藏



佛說五大施經

宋施護等譯

佛世尊一時在舍衛國祇樹給孤獨園與苾芻衆俱。佛告諸苾芻言。有五種大施。今爲汝說。何等爲五。所謂一不殺生。是爲大施。二不偷盜。三不邪染。四不妄語。五不飲酒。是爲大施。以何義故。持不殺行。而名大施。謂不殺故。能與無量有情。施其無畏。以無畏故。無怨無憎無害。由彼無量有情。得無畏已。無怨憎害已。乃於天上人間得安隱樂。是故不殺名爲大施。不偷盜。不邪染。不妄語。不飲酒。亦復如是。

八大人覺經

後漢安息國沙門安世高譯

爲佛弟子。常於晝夜。至心誦念八大人覺。

第一覺悟。世間無常。國土危脆。四大苦空。五陰無我。生滅變異。虛僞無主。心是惡源。形爲罪藪。如是觀察。漸離生死。

第二覺知。多欲爲苦。生死疲勞。從貪欲起。少欲無爲。身心自在。

第三覺知。心無厭足。惟得多求。增長罪惡。菩薩不爾。常念知足。安貧守道。惟慧是業。

第四覺知。懈怠墜落。常行精進。破煩惱惡。摧伏四魔。出陰界獄。

第五覺悟。愚癡生死。菩薩常念。廣學多聞。增長智慧。成就辯才。教化一切。悉以大樂。

第六覺知貧苦多怨。橫結惡緣。菩薩布施等念。怨親不念。舊惡不憎。惡人第七覺悟。五欲過患。雖爲俗人。不染世樂。常念三衣。瓦鉢法器。志願出家。守道清白。梵行高遠。慈悲一切。

第八覺知生死熾然。苦惱無量。發大乘心。普濟一切。願代衆生。受無量苦。令諸衆生。畢竟大樂。

如此八事。乃是諸佛菩薩大人之所覺悟。精進行道。慈悲修慧。乘法身船。至涅槃岸。復還生死。度脫衆生。

以前八事。開導一切。令諸衆生。覺生死苦。捨離五欲。修心聖道。若佛弟子。誦此八事。於念念中。滅無量罪。進趣菩提。速登正覺。永斷生死。常住快樂。八大人覺經。

藥師瑠璃光如來本願功德經

唐三藏法師玄奘奉 詔譯

如是我聞。一時薄伽梵遊化諸國。至廣嚴城。住樂音樹下。與大苾芻衆八千人俱。菩薩摩訶薩三萬六千。及國王大臣。婆羅門居士。天龍八部。人非人等。無量大衆。恭敬圍繞。而爲說法。爾時曼殊室利法王子。承佛威神。從座而起。偏袒一肩。右膝著地。向薄伽梵。曲躬合掌。白言。世尊。惟願演說。如是相類。諸佛名號。及本大願。殊勝功德。令諸聞者。業障消除。爲欲利樂。像法轉時。諸有情故。

爾時世尊。讚曼殊室利童子言。善哉善哉。曼殊室利。汝以大悲。勸請我說。諸佛名號。本願功德。爲拔業障。所纏有情。利益安樂。像法轉時。諸有情故。汝今諦聽。極善思惟。當爲汝說。曼殊室利言。唯然。願說。我等樂聞。佛告曼

殊室利。東方去此過十殑伽沙等佛土。有世界名淨琉璃。佛號藥師琉璃光如來。應正等覺。明行圓滿。善逝世間解。無上士。調御丈夫。天人師。佛。薄伽梵。曼殊室利。彼世尊藥師琉璃光如來。本行菩薩道時。發十二大願。令諸有情。所求皆得。

第一大願。

願我來世。得阿耨多羅三藐三菩提時。自身光明。熾然照耀。無量無數。無邊世界。以三十二大丈夫相。八十隨形莊嚴其身。令一切有情。如我無異。

第二大願。

願我來世。得菩提時。身如琉璃。內外明徹。淨無瑕穢。光明廣大。功德巍巍。身善安住。燄網莊嚴。過於日月。幽冥衆生。悉蒙開曉。隨意所趣。作諸事業。

第三大願。



願我來世得菩提時。以無量無邊智慧方便。令諸有情。皆得無盡所受用物。莫令衆生有所乏少。

#### 第四大願。

願我來世得菩提時。若諸有情。行邪道者。悉令安住菩提道中。若行聲聞獨覺乘者。皆以大乘而安立之。

#### 第五大願。

願我來世得菩提時。若有無量無邊有情。於我法中。修行梵行。一切皆令得不缺戒。具三聚戒。設有毀犯。聞我名已。還得清淨。不墮惡趣。

#### 第六大願。

願我來世得菩提時。若諸有情。其身下劣。諸根不具。醜陋頑愚。盲聾瘖瘂。攣躄背僂。白癩顛狂。種種病苦。聞我名已。一切皆得端正黠慧。諸根完具。

無諸疾苦。

第七大願。

願我來世得菩提時。若諸有情。衆病逼切。無救無歸。無醫無藥。無親無家。貧窮多苦。我之名號。一經其耳。衆病悉除。身心安樂。家屬資具。悉皆豐足。乃至證得無上菩提。

第八大願。

願我來世得菩提時。若有女人。爲女。百惡之所逼惱。極生厭離。願捨女身。聞我名已。一切皆得轉女成男。具丈夫相。乃至證得無上菩提。

第九大願。

願我來世得菩提時。令諸有情。出魔罣網。解脫一切外道纏縛。若墮種種惡見稠林。皆當引攝置於正見。漸令修習。諸菩薩行。速證無上正等菩提。

第十大願。

願我來世得菩提時。若諸有情。王法所加。縛錄鞭撻。繫閉牢獄。或當刑戮。及餘無量。災難凌辱。悲愁煎逼。身心受苦。若聞我名。以我福德威神力故。皆得解脫一切憂苦。

第十一大願。

願我來世得菩提時。若諸有情。饑渴所惱。爲求食故。造諸惡業。得聞我名。專念受持。我當先以上妙飲食。飽足其身。後以法味。畢竟安樂。而建立之。

第十二大願。

願我來世得菩提時。若諸有情。貧無衣服。蚊蟲寒熱。晝夜逼惱。若聞我名。專念受持。如其所好。卽得種種上妙衣服。亦得一切寶莊嚴具。華鬘塗香。鼓樂衆伎。隨心所翫。皆令滿足。

曼殊室利。是爲彼世尊藥師瑠璃光如來。應正等覺。行菩薩道時。所發十二微妙上願。復次。曼殊室利。彼世尊藥師瑠璃光如來。行菩薩道時。所發大願。及彼佛土功德莊嚴。我若一劫。若一劫餘。說不能盡。然彼佛土。一向清淨。無有女人。亦無惡趣。及苦音聲。瑠璃爲地。金繩界道。城闕宮閣。軒窗羅網。皆七寶成。亦如西方極樂世界。功德莊嚴。等無差別。於其國中。有二菩薩摩訶薩。一名日光徧照。二名月光徧照。是彼無量無數菩薩衆之上首。次補佛處。悉能持彼世尊藥師瑠璃光如來。正法寶藏。是故曼殊室利。諸有信心。善男子。善女人等。應當願生彼佛世界。

爾時世尊。復告曼殊室利童子言。曼殊室利。有諸衆生。不識善惡。惟懷貪恠。不知布施。及施果報。愚癡無智。闕於信根。多聚財寶。勤加守護。見乞者來。其心不喜。設不獲已。而行施時。如割身肉。深生痛惜。復有無量慳貪有

情積集資財。於其自身。尚不受用。何況能與父母妻子。奴婢作使。及來乞者。彼諸有情。從此命終。生餓鬼界。或傍生趣。由昔人間。曾得暫聞藥師瑠璃光如來名故。今在惡趣。暫得憶念。彼如來名。卽於念時。從彼處沒。還生人中。得宿命念。畏惡趣苦。不樂欲樂。好行惠施。讚歎施者。一切所有。悉無貪惜。漸次尙能。以頭目手足。血肉身分。施來求者。況餘財物。復次。曼殊室利。若諸有情。雖於如來受諸學處。而破尸羅。有雖不破尸羅。而破軌則。有於尸羅軌則。雖得不壞。然毀正見。有雖不毀正見。而棄多聞。於佛所說。契經深義。不能解了。有雖多聞。而增上慢。由增上慢。覆蔽心故。自是非他。嫌謗正法。爲魔伴黨。如是愚人。自行邪見。復令無量。俱眡有情。墮大險坑。此諸有情。應於地獄。傍生鬼趣。流轉無窮。若得聞此藥師瑠璃光如來名號。便捨惡行。修諸善法。不墮惡趣。設有不能捨諸惡行。修行善

法墮惡趣者。以彼如來本願威力。令其現前。暫聞名號。從彼命終。還生人趣。得正見精進。善調意樂。便能捨家。趣於非家。如來法中。受持學處。無有毀犯。正見多聞。解甚深義。離增上慢。不謗正法。不爲魔伴。漸次修行。諸菩薩行。速得圓滿。

復次。曼殊室利。若諸有情。慳貪嫉妬。自讚毀他。當墮三惡趣中。無量千歲。受諸劇苦。受劇苦已。從彼命終。來生人間。作牛馬駝驢。恆被鞭撻。饑渴逼惱。又常負重。隨路而行。或得爲人。生居下賤。作人奴婢。受他驅役。恆不自在。若昔人中。曾聞世尊藥師琉璃光如來名號。由此善因。今復憶念。至心歸依。以佛神力。衆苦解脫。諸根聰利。智慧多聞。恆求勝法。常遇善友。永斷魔罣。破無明殼。竭煩惱河。解脫一切生老病死。憂愁苦惱。

復次。曼殊室利。若諸有情。好喜乖離。更相鬪訟。惱亂自他。以身語意。造作

增長種種惡業。展轉常爲不饒益事。互相謀害。告召山林樹塚等神。殺諸衆生。取其血肉。祭祀藥叉羅刹婆等。書怨人名。作其形像。以惡呪術。而呪詛之。厭魅蠱道。呪起屍鬼。令斷彼命。及壞其身。是諸有情。若得聞此藥師琉璃光如來名號。彼諸惡事。悉不能害。一切展轉。皆起慈心。利益安樂。無損惱意。及嫌恨心。各各歡悅。於自所受。生於喜足。不相侵陵。互爲饒益。復次。曼殊室利。若有四衆。苾芻苾芻尼。鄔波索迦。鄔波斯迦。及餘淨信。善男子。善女人等。有能受持。八分齋戒。或經一年。或復三月。受持學處。以此善根。願生西方極樂世界。無量壽佛所。聽聞正法。而未定者。若聞世尊藥師琉璃光如來名號。臨命終時。有八大菩薩。其名曰。文殊師利菩薩。觀世音菩薩。得大勢菩薩。無盡意菩薩。寶檀華菩薩。藥王菩薩。藥上菩薩。彌勒菩薩。是八大菩薩。乘空而來。示其道路。卽於彼界。種種雜色。衆寶華中。白。

然化生。或有因此。生於天上。雖生天上。而本善根。亦未窮盡。不復更生。諸餘惡趣。天上壽盡。還生人間。或爲輪王。統攝四洲。威德自在。安立無量。百千有情。於十善道。或生刹帝利。婆羅門。居士。大家。多饒財寶。倉庫盈溢。形相端嚴。眷屬具足。聰明智慧。勇健威猛。如大力士。若是女人。得聞世尊藥師瑠璃光如來名號。至心受持。於後不復更受女身。

復次。曼殊室利。彼藥師瑠璃光如來。得菩提時。由本願力。觀諸有情。遇衆病苦。瘦癯乾消。黃熱等病。或被厭魅。蠱毒所中。或復短命。或時橫死。欲令是等病苦消除。所求願滿。時彼世尊。入三摩地。名曰除滅一切衆生苦惱。既入定已。於肉髻中。出大光明。光中演說。大陀羅尼曰。

南謨薄伽伐帝

鞞殺社

寔嚕薛琉璃

鉢喇婆

喝囉闍

也 但陀揭多耶

阿囉喝帝

三藐三勃陀耶

怛姪陀



唵

鞞殺逝

鞞殺逝

鞞殺社

三沒揭帝莎訶

爾時光中說此呪已。大地震動。放大光明。一切衆生病苦皆除。受安隱樂。曼殊室利。若見男子女人有病苦者。應當一心爲彼病人。常清淨澡漱。或食或藥。或無蟲水。呪一百八遍。與彼服食。所有病苦悉皆消滅。若有所求。至心念誦。皆得如是。無病延年。命終之後。生彼世界。得不退轉。乃至菩提。是故曼殊室利。若有男子女人。於彼藥師瑠璃光如來。至心懇重。恭敬供養者。常持此呪。勿令廢忘。

復次。曼殊室利。若有淨信男子女人。得聞藥師瑠璃光如來。應正等覺。所  
有名號。聞已誦持。晨嚼齒木。澡漱清淨。以諸香華。燒香塗香。作衆伎樂。供  
養形像。於此經典。若自書。若教人書。一心受持。聽聞其義。於彼法師。應修  
供養。一切所有資身之具。悉皆施與。勿令乏少。如是便蒙諸佛護念。所求

願滿乃至菩提。

爾時曼殊室利童子白佛言。世尊。我當誓於像法轉時。以種種方便。令諸淨信善男子善女人等。得聞世尊藥師琉璃光如來名號。乃至睡中。亦以佛名覺悟其耳。世尊。若於此經受持讀誦。或復爲他演說開示。若自書。若教人書。恭敬尊重。以種種華香塗香末香燒香華鬘瓔珞旛蓋伎樂。而爲供養。以五色綵作囊盛之。掃灑淨處。敷設高座。而用安處。爾時四大天王。與其眷屬。及餘無量百千天衆。皆詣其所。供養守護。世尊。若此經寶流行之處。有能受持。以彼世尊藥師琉璃光如來本願功德。及聞名號。當知是處無復橫死。亦復不爲諸惡鬼神奪其精氣。設已奪者。還得如故。身心安樂。

佛告曼殊室利。如是如是。如汝所說。曼殊室利。若有淨信善男子善女人

等。欲供養彼世尊藥師瑠璃光如來者。應先造立彼佛形像。敷清淨座。而安處之。散種種華。燒種種香。以種種幢幡莊嚴其處。七日七夜。受八分齋。戒食清淨食。澡浴香潔。著清淨衣。應生無垢濁心。無怒害心。於一切有情起利益安樂。慈悲喜捨平等之心。鼓樂歌讚。右遶佛像。復應念彼如來本願功德。讀誦此經。思惟其義。演說開示。隨所樂求。一切皆遂。求長壽得長壽。求富饒得富饒。求官位得官位。求男女得男女。若復有人。忽得惡夢。見諸惡相。或怪鳥來集。或於住處。百怪出現。此人若以衆妙資具。恭敬供養彼世尊藥師瑠璃光如來者。惡夢惡相。諸不吉祥。皆悉隱沒。不能爲患。或有水火刀毒懸險。惡象師子。虎狼熊羆。毒蛇惡蠍。蜈蚣蚰蜒。蚊蟲等怖。若能至心憶念彼佛。恭敬供養。一切怖畏。皆得解脫。若他國侵擾。盜賊反亂。憶念恭敬彼如來者。亦皆解脫。

復次。曼殊室利。若有淨信善男子。善女人等。乃至盡形。不事餘天。唯當一心。歸佛法僧。受持禁戒。若五戒。十戒。菩薩四百戒。苾芻二百五十戒。苾芻尼五百戒。於所受中。或有毀犯。怖墮惡趣。若能專念。彼佛名號。恭敬供養者。必定不受。三惡趣生。或有女人。臨當產時。受於極苦。若能至心。稱名禮讚。恭敬供養。彼如來者。衆苦皆除。所生之子。身分具足。形色端正。見者歡喜。利根聰明。安隱少病。無有非人。奪其精氣。

爾時世尊。告阿難言。如我稱揚。彼世尊藥師瓔珞光如來。所有功德。此是諸佛。甚深行處。難可解了。汝爲信不。阿難白言。大德世尊。我於如來。所說契經。不生疑惑。所以者何。一切如來。身語意業。無不清淨。世尊。此日月輪。可令墮落。妙高山王。可使傾動。諸佛所言。無有異也。世尊。有諸衆生。信根不具。聞說諸佛。甚深行處。作是思惟。云何但念藥師瓔珞光如來。一佛名。

號便獲爾所功德勝利。由此不信返生誹謗。彼於長夜失大利樂。墮諸惡趣。流轉無窮。佛告阿難。是諸有情。若聞世尊藥師瑠璃光如來名號。至心受持。不生疑惑。墮惡趣者。無有是處。阿難。此是諸佛甚深所行。難可信解。汝今能受。當知皆是如來威力。阿難。一切聲聞獨覺。及未登地。諸菩薩等。皆悉不能如實信解。唯除一生所繫菩薩。阿難。人身難得。於三寶中。信敬尊重。亦難可得。聞世尊藥師瑠璃光如來名號。復難於是。阿難。彼藥師瑠璃光如來。無量菩薩行。無量善巧方便。無量廣大願。我若一劫。若一劫餘。而廣說者。劫可速盡。彼佛行願。善巧方便。無有盡也。

爾時衆中有一菩薩摩訶薩。名曰救脫。卽從座起。偏袒右肩。右膝著地。曲躬合掌。而白佛言。大德世尊。像法轉時。有諸衆生。爲種種患之所困厄。長病羸瘦。不能飲食。喉唇乾燥。見諸方暗。死相現前。父母親屬朋友知識。涕

泣圍遶。然彼自身。臥在本處。見琰魔使。引其神識。至於琰魔法王之前。然諸有情。有俱生神。隨其所作。若罪若福。皆具書之。盡持授與。琰魔法王。爾時彼王。推問其人。計算所作。隨其罪福。而處斷之。時彼病人。親屬知識。若能爲彼歸依。世尊藥師瑠璃光如來。請諸衆僧。轉讀此經。然七層之燈。懸五色續命神旛。或有是處。彼識得還。如在夢中。明了自見。或經七日。或二十一日。或三十五日。或四十九日。彼識還時。如從夢覺。皆自憶知。善不善業。所得果報。由自證見。業果報故。乃至命難。亦不造作。諸惡之業。是故淨信。善男子。善女人等。皆應受持。藥師瑠璃光如來名號。隨力所能。恭敬供養。爾時阿難問。救脫菩薩曰。善男子。應云何恭敬供養。彼世尊藥師瑠璃光如來。續命旛燈。復云何造。救脫菩薩言。大德。若有病人。欲脫病苦。當爲其人。七日七夜。受持八分齋戒。應以飲食。及餘資具。隨力所辦。供養。苾芻。

僧晝夜六時禮拜行道。供養彼世尊藥師瑠璃光如來。讀誦此經。四十九遍。然四十九燈。造彼如來形像七軀。一一像前各置七燈。一一燈量大如車輪。乃至四十九日。光明不絕。造五色綵旛。長四十九搽手。應放雜類衆生。至四十九。可得過度。危厄之難。不爲諸橫惡鬼所持。

復次阿難。若刹帝利。灌頂王等。災難起時。所謂人衆。疾疫難。他國侵逼難。自界叛逆難。星宿變怪難。日月薄蝕難。非時風雨難。過時不雨難。彼刹帝利。灌頂王等。爾時應於一切有情。起慈悲心。赦諸繫閉。依前所說。供養之法。供養彼世尊藥師瑠璃光如來。由此善根。及彼如來。本願力故。令其國界。卽得安隱。風雨順時。穀稼成熟。一切有情。無病歡樂。於其國中。無有暴惡藥叉等神。惱有情者。一切惡相。皆卽隱沒。而刹帝利灌頂王等。壽命色力。無病自在。皆得增益。阿難。若帝后妃主。儲君王子。大臣輔相。中宮綵女。

百官黎庶爲病所苦。及餘厄難。亦應造立五色神旛。然燈續明。放諸生命。散雜色華。燒衆名香。病得除愈。衆難解脫。爾時阿難問救脫菩薩言。善男子。云何已盡之命而可增益。救脫菩薩言。大德。汝豈不聞如來說有九橫死耶。是故勸造續命旛燈。修諸福德。以修福故。盡其壽命。不經苦患。阿難問言。九橫云何。救脫菩薩言。若諸有情。得病雖輕。然無醫藥。及看病者。設復遇醫。授以非藥。實不應死。而便橫死。又信世間邪魔外道妖孽之師。妄說禍福。便生恐動。心不自正。卜問覓禍。殺種種衆生。解奏神明。呼諸魍魎。請乞福佑。欲冀延年。終不能得。愚癡迷惑。信邪倒見。遂令橫死。入於地獄。無有出期。是名初橫。二者。橫被王法之所誅戮。三者。畋獵嬉戲。耽淫嗜酒。放逸無度。橫爲非人奪其精氣。四者。橫爲火焚。五者。橫爲水溺。六者。橫爲種種惡獸所噉。七者。橫墮山崖。八者。橫爲毒藥。厭禱呪詛。起屍鬼等之所



中害九者。饑渴所困。不得飲食。而便橫死。是爲如來略說橫死。有此九種。其餘復有無量諸橫。難可具說。

復次阿難。彼琰魔王。主領世間名籍之記。若諸有情。不孝五逆。破辱三寶。壞君臣法。毀於信戒。琰魔法王。隨罪輕重。考而罰之。是故我今勸諸有情。然燈造旛。放生修福。令度苦厄。不遭衆難。爾時衆中有十二藥叉大將。俱在會坐。所謂

宮毘羅大將

伐折羅大將

迷企羅大將

安底羅大將

類你羅大將

珊底羅大將

因達羅大將

波夷羅大將

摩虎羅大將

眞達羅大將

招杜羅大將

毘羯羅大將

此十二藥叉大將。一一各有七千藥叉。以爲眷屬。同時舉聲。白佛言。世尊。我等今者。蒙佛威力。得聞世尊藥師琉璃光如來名號。不復更有惡趣之

怖我等相率皆同一心。乃至盡形歸佛法僧。誓當荷負一切有情。爲作義利。饒益安樂。隨於何等村城國邑。空閑林中。若有流布此經。或復受持藥師瑠璃光如來名號。恭敬供養者。我等眷屬衛護是人。皆使解脫一切苦難。諸有願求。悉令滿足。或有疾厄。求度脫者。亦應讀誦此經。以五色縷結我名字。得如願已。然後解結。

爾時世尊讚諸藥叉大將言。善哉善哉。大藥叉將。汝等念報世尊藥師瑠璃光如來恩德者。常應如是。利益安樂。一切有情。

爾時阿難白佛言。世尊。當何名此法門。我等云何奉持。佛告阿難。此法門名說藥師瑠璃光如來本願功德。亦名說十二神將。饒益有情。結願神呪。亦名拔除一切業障。應如是持。時薄伽梵說是語已。諸菩薩摩訶薩。及大聲聞國王大臣。婆羅門居士。天龍藥叉。健達縛。阿素洛。揭路荼。緊捺洛。莫呼洛伽。人非人等。一切大衆。聞佛所說。皆大歡喜。信受奉行。

藥師瑠璃光如來本願功德經 終

# 般若波羅蜜多心經

觀自在菩薩。行深般若波羅蜜多時。照見五蘊皆空。度一切苦厄。舍利子。色不異空。空不異色。色即是空。空即是色。受想行識。亦復如是。舍利子。是諸法空相。不生不滅。不垢不淨。不增不減。是故空中無色。無受想行識。無眼耳鼻舌身意。無色聲香味觸法。無眼界。乃至無意識界。無無明。亦無無明盡。乃至無老死。亦無老死盡。無苦集滅道。無智亦無得。以無所得故。菩提薩埵。依般若波羅蜜多故。心無罣礙。無罣礙故。無有恐怖。遠離顛倒夢想。究竟涅槃。三世諸佛。依般若波羅蜜多故。得阿耨多羅三藐三菩提。故知般若波羅蜜多。是大神呪。是大明呪。是無上呪。是無等等呪。能除一切苦。真實不虛。故說般若波羅蜜多呪。即說呪曰。

揭諦。

揭諦。

波羅揭諦。

波羅僧揭諦。

菩提薩婆訶。

佛說戒香經

宋法賢譯

如是我聞。一時佛在舍衛國祇樹給孤獨園。與大比丘衆俱。爾時尊者阿難來詣佛所。到已。頭面禮足。合掌恭敬。而白佛言。世尊。我有少疑。欲當啓問。唯願世尊爲我解說。我見世間有三種香。所謂根香。花香。子香。此三種香。徧一切處。有風而聞。無風亦聞。其香云何。爾時世尊告尊者阿難。勿作是言。謂此三種之香。徧一切處。有風而聞。無風亦聞。此三種香。有風無風。徧一切處。而非得聞。阿難。汝今欲聞普徧香者。應當諦聽。爲汝宣說。阿難。白佛言。世尊。我今樂聞。唯願宣說。佛告阿難。有風無風。香徧十方者。世間若有近事男。近事女。持佛淨戒。行諸善法。謂不殺。不盜。不淫。不妄語。及不飲酒。是近事男。近事女。如是。戒香徧聞十方。而彼十方咸皆稱讚。而作是言。

所有世間沈檀等

其香微妙非徧聞

若人持佛淨戒香

諸天普聞皆愛敬

如是具足清淨戒

乃至常行諸善法

是人能解世間縛

所有諸魔常遠離

爾時尊者阿難及比丘衆聞佛語已歡喜信受禮佛而退。

於某城中有如是近事男女持佛淨戒行諸善法謂不殺不盜不淫不妄語及不飲酒等具此戒法是人獲如是之香有風無風徧聞十方咸皆稱讚而得愛敬爾時世尊而說頌曰。

世間所有諸花果

乃至沈檀龍麝香

如是等香非徧聞

唯聞戒香徧一切

栴檀鬱金與蘇合

優鉢羅并摩隸花

如是諸妙花香中

唯有戒香而最上

楞嚴經大勢至菩薩圓通章

大勢至法王子與其同倫五十二菩薩。卽從座起。頂禮佛足。而白佛言。我憶往昔恆河沙劫。有佛出世。名無量光。十二如來。相繼一劫。其最後佛。名超日月光。彼佛教我念佛三昧。譬如有人。一專爲憶。一人專忘。如是二人。若逢不逢。或見非見。二人相憶。二憶念深。如是乃至。從生至生。同於形影。不相乖異。十方如來。憐念衆生。如母憶子。若子逃逝。雖憶何爲。子若憶母。如母憶時。母子歷生。不相違遠。若衆生心。憶佛念佛。現前當來。必定見佛。去佛不遠。不假方便。自得心開。如染香人。身有香氣。此則名曰香光莊嚴。我本因地。以念佛心。入無生忍。今於此界。攝念佛人。歸於淨土。佛問圓通。我無選擇。都攝六根。淨念相繼。得三摩地。斯爲第一。

# 摩利支天菩薩



3

等諸天龍八部前後圍遶。爾時舍利弗即從座起。偏袒右肩。右膝著地。合掌向佛。而白佛言。世尊。於未來世。末世衆生。作何等法。得脫諸難。

佛告舍利弗。諦聽諦聽。我今爲汝說於此事。爾時會衆歡喜踊躍。重勸請佛。

佛說摩利支天菩薩陀羅尼經  
大興善寺三藏沙門  
不空奉詔譯

如是我聞。一時佛在舍衛國祇樹給孤獨園。與大阿羅漢千二百五十人俱。復有無量大菩薩衆。彌勒菩薩。曼殊室利菩薩。觀世音菩薩。而爲上首。及摩利支

4

爾時世尊告諸比丘。日前有天。名摩利支。有大神通自在之法。常行日前。日不見彼。彼能見日。無人能見。無人能知。無人能捉。無人能害。無人欺誑。無人能縛。無人能債其財物。無人能罰。不畏怨家能得其便。

佛告諸比丘。若有人知彼摩利

支天名者。彼人亦不可見。亦不可知。亦不可捉。亦不可害。亦不爲人欺誑。亦不爲人縛。亦不爲人債其財物。亦不爲人責罰。亦不爲怨家能得其便。

佛告諸比丘。若善男子善女人。知彼摩利支天名者。應作是言。我弟子某甲知彼摩利支天名。

故。無人能見我。無人能知我。無人能捉我。無人能害我。無人能欺誑我。無人能縛我。無人能債我財物。無人能責罰我。亦不爲怨家能得我。便。此呪有大神力。所作成就。破一切惡。若用結界。百由旬內一切諸惡。無敢入者。爾時世尊卽說呪曰。

南無佛陀耶一南無達摩耶二南無僧伽耶三恒姪他四遏囉迦末斯五摩囉迦末斯六蘇途末斯七支鉢囉末斯八摩訶支鉢囉末斯九摩利支夜末斯十安怛陀那夜末斯十一那謨粹都底十二莎訶十三

王難中護我。賊難中護我。行路

中護我。失於道路曠野中護我。晝日護我。夜中護我。水難中護我。火難中護我。羅刹難中護我。荼枳爾鬼難中護我。毒藥難中護我。佛實語護我。法實語護我。僧實語護我。天實語護我。仙人實語護我。

恒姪他一阿羅拘隸二阿囉拘



隸三雞栗底知約反四薩婆迦羅醯蔽

蔽亞反薩蒲跋突瑟躋二合蔽六薩

婆伊都波達羅轉蔽七囉上音又

囉上音又自稱名字八莎呵九

奉請摩利支天呪。一名摩利支

天身呪。呪曰。

娜謨囉路那二合路囉二合夜耶一

摩唎支唎駄去音耶二摩婆上帝

法最勝。持此呪者。面向百踰闍

那。一切鬼神惡人。無能得其便

者。若於難中行時。晨起誦前身

呪。呪一掬水。四方散灑。及灑自

身。若衣襟若衣袂。若袈裟角。一

呪一結。總作三結。卽往難中行。

連誦前二大呪而行。所有一切

事難軍防主者。悉皆迷醉。都無

移沙上彌三跋姪他四婆上囉

去梨五婆駄梨六婆囉阿目溪

七薩婆上徒瑟誓去二槃上駄槃

上駄九娑婆阿十

佛告諸比丘。若有人識彼摩利

支天菩薩者。除一切障難。王難

賊難。猛獸毒蟲之難。水火等難。

若人欲行此法者。一切法中此

覺知之者。

佛說是經已。告諸比丘比丘尼。

優婆塞優婆夷。國王大臣及諸

人民等。聞佛說是摩利支天陀

羅尼。一心受持之者。是人不爲

一切諸惡所害。諸比丘。若有人

能書寫讀誦受持之者。若著髻

中。若著衣中。隨身而行。一切諸

惡悉皆退散。無敢當者。是諸四衆。天龍八部。禮佛而退。歡喜奉行。

佛說摩利支天菩薩陀羅尼經

音釋

爾你伽類哈切恒答囉喇醯希

麟麟鞞鞞比咳答喇利

謹按。金元好問續夷堅志。忻

州劉軍判。貞祐初。聞朔方人馬動。家誦摩利支天呪。及州陷。二十五口俱免兵禍。獨一奴不信。迫圍城。始誦之。被虜四五日。亦逃歸。南渡後居永寧。卽施此呪。文士薛曼卿記其事。是經逢凶化吉。遇難成祥。廣大靈感。不可思議。丙寅

七月。長慶遵依梁譯唐石本。發心喜捨萬卷。魏剛長易子駿二居士。亦相繼印施。仰賴我佛慈悲。凡信心受持者。均蒙加護。今秋明道上人郭淨繼翟覺立江味融黃妙悟朱智卓任懺盒諸居士商同再依唐不空三藏所譯。用高麗

藏本。仿古活字。印成梵夾小冊。廣爲流通。便於持誦。李觀權居士願力最宏。資助成之。以斯功德。上祈道心堅固。天下太平。庚午七月。佛弟子徐長慶謹誌。

己丑春下智鑿夫人發心翻印

諸惡莫作 衆善奉行  
自淨其意 是諸佛教

上海图书馆藏书



A541 212 0010 1833B



民國三十八年三月一日出版

七經合刊

編集者 大法輪書局  
刊行處 大法輪書局

上海(23)南京西路一四五十一弄12號  
(舊名 哈同路慈厚北里十二號)

The Maha Dharmacakra Bookstore  
Lane 1451, No. 12, Nanking

Road (West), Shanghai, China.